

Bald isse doo, die Fassenacht

Deletzd habb isch iwver die Fassenacht vor etlische John geschriwwe, in Zeide, in dene die Fraa unn isch noch e bissi jinger gewese sinn. No ja, doomols hawwe merr noch mettgemachd, awwer heitzedaach dut die Fassenacht ferr uns nor noch im Fernseh stattfinne. Selbst de Flerschemer Fassenachtszuuch oozegugge, dess gieht nimmi, dess Laafe in die Stadt unn des lange Stiehbleiwe iss nimmi droi.

Doo isses aach gut, dass die Sitzung vumm Flerschemer Carnevalverein im Fernseh iwvertraache werdd, die gugge merr uns immer oo. Obwohl die joo mieh ferr diejenische gemachd werdd, die nitt unbedingt vunn Flerschem sinn, sie werdd halt ferr Leit gemacht, die sisch aach die Sitzunge vunn de Meenzer, vunn de Kölner unn vunn de Franke aus Veitshöchheim oogugge. Doodemett moon isch, dass in dere Sitzung die original Flerschemer Sprooch, unser Mundart, wenn iwverhaupt, donn zimmlisch sozesaache geglätt gesproche unn nitt gebabbeld werdd. Dess muss halt soi, wenn Leit aus Owwerhesse odder aus Berlin sisch die Sendung oogugge, die solle halt alle die Spässjer vunn dene Redner rischdisch verstieh.

Wenn de Carneval Verein ferr die Saalfassenacht zustännisch iss, su iss de Flerschemer Nannclub ferr die Strooßefassenacht zustännisch. Unn dess mähderr gut, seit dene Daache, als noch de Jean Dieser, de Schoo Disser im Club onn de Spitz gewese iss. Jahr ferr Jahr kumme mieh Leit nooch Flerschem, um sisch de Zuuch oozegugge, merr kann also saache, de Zuuch iss e Aushängeschild ferr Flerschem mett vill Zuuchnummern unn gute Musikkapelle. Sinn merr also fruh, dass de Nannclub aach in Zukunft die Flerschemer Fassenacht gestalde dut, mett gute Leit onn de Spitz werrds immer gut gelinge.

Eiern Honnes